

**Uunga siunnersuut: Aningaasanoorutit ilaannit iluanaarutinit agguassisarneq pillugu
Inatsisartut Inatsisaat nr. xx, xx. XXXX 2011-meersoq**

Kapitali 1

Agguanneqartarnerat

§ 1. Aningaasanoorutit ilaat pillugit Kalaallit Nunaannut inatsit naapertorlugu pissarsiassat ukiumoortumik Kalaallit Nunaannut pisassangortinneqartartut Naalakkersuisut tamanut iluaqutasussamik siunertanut makkununnga agguatissavaat:

- 1) 50 %-ii timersorernut tamanit peqataaffigineqarsinnaasunut, innarluutillit utoqqaallu timersornerat ilanngullugu,
- 2) 9,1 %-ii piukkunnaatillit pikkorinnerillu timersornerinut,
- 3) 13,6 %-ii meeqqat inuusuttullu peqatigiiffiinut, aamma
- 4) 27,3 %-ii tamanut iluaqutasussamik siunertanut allanut, taamatuttaaq kulturimut tunngatillugu siunertanut, inunniq qaammarsaanermut siunertanut, nappaatinik akiuiniarnermut pinaveersaartitsinermullu siunertanut, inooqatigiinnermut tunngasunut siunertanut, asimiititsinissanik siunertanut aamma tamanut iluaqutasussanik ilisimatusarniarluni siunertanut.

Imm. 2. Aningaasat Kalaallit Nunaanni pinnguaatit pillugit naalagaaffimmut akitsuutip 2004-mi atorunnaarsinneqartup annertoqatai siunertanut imm. 1-imi taaneqartunit allaanerusunut atorneqarsinnaapput.

Imm. 3. Naalakkersuisut aningaasaateqarfinnut suliniaqatigiiffinnullu allanut aningaasanoorutit ilaannit iluanaarutinik tamanut iluaqutasussanik siunertanut agguassisartunut imm. 1-imi taaneqartutut tamanut iluaqutasussanik siunertanut tapiissuteqartoqarsinnaatillugu aningasanik tunissuteqarnissaq pillugu isumaqatigiissuteqarsinnaapput. Aningasanik tunissutissatut isumaqatigiissutigineqartut pissarsiassanit ukiumoortumik Kalaallit Nunaannut pisassangortinneqartunit imm. 1-imi taaneqartunut agguassisqartinnagu ilanngaatigineqassapput.

§ 2. Atugassanngortitat § 1, imm. 1-imi taaneqartut imatut agguanneqassapput:

- 1) atugassanngortitat § 1, imm. 1, nr. 1-imi taaneqartut Kalaallit Nunaanni Timersoqatigiit Kattuffiannut, timersorernut tamanit peqataaffigineqarsinnaasunut, innarluutillit utoqqaallu timersornerat ilanngullugu, agguasseqqinnermik isumaginnittussamut agguanneqassapput,
- 2) atugassanngortitat § 1, imm. 1, nr. 2-mi taaneqartut Elite Sport Greenlandimut, piukkunnaatillit pikkorinnerillu timersornerinut agguasseqqinnermik isumaginnittussamut agguanneqassapput,
- 3) atugassanngortitat § 1, imm. 1, nr. 3-mi taaneqartut Sorlammut, meeqqat inuusuttullu peqatigiiffiinut agguasseqqinnermik isumaginnittussamut agguanneqassapput, aamma
- 4) atugassanngortitat § 1, imm. 1, nr. 4-mi taaneqartut qinnuteqaateqartoqarneratigut Naalakkersuisunit agguanneqassapput.

Imm. 2. Imm. 1, nr. 1-miit 3-mut atugassanngortitat taaneqartut agguateqqinneranni allaffissornikkut aqutsineq Naalakkersuisut tigusinnaavaat imatut pisoqartillugu:

- 1) soqtigisaqaqatigiiffiup Naalakkersuisut taamaaliortoqarnissaanik kissaateqarfifippagit, imaluunniit
- 2) pingaarutilimmik aalajangersimasumillu tunngavilersukkamik soqtigisaqaqatigiiffik suliassaminik isumaginnissinnaajunnaarsorineqarpat.

Kapitali 2

Tapeeriaatsit, tapiiffigineqarnissamut piumasaqaatit aamma periutsit

§ 3. Inunnut nunami maani najugaqartunut imaluunniit peqatigiiffinnut, soqutigisaqaqatigiiffinnut, suliffeqarfinnut, oqartussaasunut il.il. Kalaallit Nunaanni angerlarsimaffeqartunut taamaallaat tapiissuteqartoqarsinnaavoq.

Imm. 2. Imm. 1-imik aalajangersagaq apeqqutaatinnagu Elite Sport Greenland inunnut Kalaallit Nunaata avataani najugalinnut tapiissuteqarsinnaavoq tapiissutisisussat Naalakkersuisunit timersornermut piukkunnaatilittut imaluunniit timersortartutut pikkorinnertut akuersissutigineqarsimappata.

Imm. 3. Imm. 1-imik aalajangersagaq apeqqutaatinnagu Avalak tapiiffigineqarsinnaavoq.

Kapitali 3

Nakkutilliineq misissuinerlu

§ 4. Soqutigisaqaqatigiiffit § 2, imm. 1, nr. 1-imiit 3-mut taaneqartut kingusinnerpaamik 1. juunimi Naalakkersuisunut ukiumut naatsorsuuteqarfiusumut qaangiuttumut naatsorsuutitik kukkunersorneqarsimasut naatsorsuutinullu atortussat allat nassiuressavaat. Naatsorsuutit ukiumi qaammatisiuteqarfiusumi qaangiuttumi atugassanngortinnejartunit agguanneqarsimasut nalunaarsuutaannik kukkunersiusumit naalagaaffimmit akuerisaasumit imaluunniit naalagaaffimmut nalunaarutigineqarsimasumit atorneqarsimasunik ilanngussivigineqassapput.

Imm. 2. Naatsorsuutit, naatsorsuutinut atortussat allat nalunaarsuutillu imm. 1-imik taaneqartut piffissaq eqqorlugu tiguneqanngippata, imaluunniit Naalakkersuisut paasippassuk aningaasanoorutit ilaannit iluanaarutit siunertanut naapertuuttumik, § 1 takuuk, atorneqanngitsut, Naalakkersuisut aningaasanoorutit ilaannit iluanaarutinit soqutigisaqaqatigiiffinnut siunissami akiliutigineqartussat kinguartissinnaavaat naatsorsuutit, naatsorsuutinut atortussat allat nalunaarsuutillu nassiuresserlugin imaluunniit aningaasanoorutit ilaannit iluanaarutit siunertanut naapertuuttumik atorneqarnissaat isumannaarneqareerserlugu. Naalakkersuisut akiliutigineqartussat kinguartinneqarnerannut atatillugu atugassanngortinnejartunik agguasseqqittarnerup allaffissornikkut aqunneqarnera tigugallarsinnaavaat.

§ 5. Tapiissutisisartut soqutigisaqaqatigiiffiillu § 2, imm. 1, nr. 1-imiit 3-mut taaneqartut piumaffigineqarnermikkut paasissutissat atorfissaqartinnejartut tamaasa Naalakkersuisunut nassiuressavaat, taamatuttaaq qinnuteqaatit, aalajangiinerit, agguassinermut najoqquressat, ilaaressat amerlassusaat, akiliutit il.il. pillugin paasissutissat.

§ 6. Tapiissutigineqartut tamakkiisumik ilaannakuusumilluunniit utertillugin akileeqquneqarsinnaapput, qinnuteqaateqartoq eqqunngitsunik paasissutissiisimappat, tapiissuteqarnissamut piumasaqaatit naammassineqarsimannngippata imaluunniit ingerlanneqartoq sinneqartoofiusimappat.

Kapitali 4

Suliassat suliarineqartarnerat aamma maalaarsinnaaneq

§ 7. Pisortat ingerlatsineranni suliassat suliarineqartarnerat pillugu Inatsisartut inatsisaanni aammalu pisortat ingerlatsineranni tamanut saqqummiussisussaatisitaaneq pillugu inatsisartut inatsisaanni aalajangersakkat § 2, imm. 1, nr. 1-imiit 3-mut soqtigisaqaqatigiiffinnut taaneqartunut atuupput taakku Inatsisartut inatsisaat manna taannalu malillugu malittarisassat atuuttussangortinnejartut naapertorlugit Naalakkersuisut sinnerlugit aalajangiinissamut piginnaatitaaffilerneqarsimappata.

§ 8. Naalakkersuisut kikkut tapiiffingineqarsinnaanerininik sinaakkutissiat, tapeeriaatsit, tapiisinnaanermut piumasaqaatit aamma tapiinermit atugassarititaasut pilligit erseqqinnerusunik malittarisassanik aalajangersaasinnaapput.

Imm. 2. Naalakkersuisut qinnuteqaatit suliarineqassappata aalajangersimasunik anguniakkat pilersaarutitaannik allaaserinninnernik, aningaasatigut missingersuutinik, ilaasortat amerlassusaannik nalunaarsuutinik, suliassatut pilersaarutinik assigisaannilluunniit uppernarsaatitut saqqummiussisoqarnissamik piumasaqaateqarsinnaaneq pillugu erseqqinnerusunik maleruagassiorsinnaapput.

Imm. 3. Naalakkersuisut naatsorsuutinik tunniussisarneq pillugu erseqqinnerusunik malittarisassanik aalajangersaasinnaapput, tamatumunnga ilanggullugu allat § 2, imm. 1, nr. 1-imiit 3-mut soqtigisaqaqatigiiffit taaneqanngitsut, aningaasanoorutit ilaannit iluanaarutinit pissarsisimagunik naatsorsuutinik saqqummiussissasut.

Imm. 4. Naalakkersuisut aningaasanoorutit ilaannit iluanaarutinik § 1, imm. 1-imi eqqartorneqartutut atuisinnaanerup saniatigut atuisinnaaneq pillugu malittarisassanik erseqqinnerusunik aalajangersaasinnaapput tamatumunnga ilanggullugit allaffissornermut aamma paasissutissiinermut atuineq.

Imm. 5. § 2-mi imm. 1, nr. 1-imiit 3-mut naapertorlugu soqtigisaqaqatigiiffinnit taakkartorneqartunit tapiissutinik agguassinermit aalajangikkat pilligit maalaarutinik suliaqarnissamut Naalakkersuisut malittarisassiorsinnaapput.

Kapitali 5

Atortuulersitsineq

§ 9. Inatsisartut inatsisaat atuutilissaq 1. januar 2012.

Imm. 2. Inatsisartut inatsisaata atuutilerneratigut tipsernermit lottorermillu iluanaarutinik agguassisarneq pillugu Inatsisartut inatsisaat nr. 7, 1. juni 2006-imeersoq atorunnaarsinneqassaq.

Namminersorlutik Oqartussat, ulloq xx. Xx. 2011

Kuupik Kleist